

आकाशवाणी जयपुर-अजमेर
प्रादेशिक समाचार

दिनांक 23.11.2024अ

समय: 18.45 बजे

- प्रदेश री सात विधानसभा सीटां माथे व्ह्या उपचुनाव मांय भाजपा पांच सीटां जीतीं-कांग्रेस अर बी.ए.पी. ने एक-एक सीट मिली।
- उपराष्ट्रपति जगदीप धनखड़ कह्यो-सरकार चिकित्सा हलका मांय व्हेवण वाळा नवाचारां ने बधावो दे रही है।
- प्रधानमंत्री नरेन्द्र मोदी काल संवारे 11 बज्यां आकाशवाणी रा 'मन की बात' कार्यक्रम मांय कार्यक्रम मांय विचार बतावेला।
- प्रदेश मांय सर्दी रो असर बध्यो-माउंट आबू मांय लगातार तीजा दिन न्यूनतम तापमान 5 डिग्री सेल्सियस दर्ज करी ज्यो।

000

प्रदेश रा सात विधानसभा हलकां मांय व्ह्या उपचुनाव मांय भारतीय जनता पार्टी पांच सीटां माथे जीत हासिल कीनी, जद के कांग्रेस ने केवल एक सीट मिली। भाजपा रा उम्मीदवार खींक्सर, झुंझुनू, देवली-उनियारा, सलूमबर अर रामगढ़ मांय जीत्या जद के कांग्रेस रा खाता मांय एकली दौसा सीट आयी। चौरासी सीट माथे भारत आदिवासी पार्टी ने जीत मिली। खींक्सर मांय भाजपा रा रेवंत राम डांगा आरएलपी री कनिका बेनीवाल ने 13 हजार 901 वोटों ऊं सिकस्त दीनी। झुंझुनू मांय भाजपा रा राजेन्द्र भांभू कांग्रेस रा अमित ओला ने 42 हजार 848 वोटों ऊं हराया। रामगढ़ मांय भाजपा रा सुखवंत सिंह कांग्रेस ऊं सीट कोस लीनी। सुखवंत सिंह कांग्रेस रा उम्मीदवार आर्यन जुबैर खान ने 13 हजार 636 मतां ऊं मात दीनी। देवली-उनियारा मांय भाजपा रा राजेन्द्र गुर्जर निर्दलीय उम्मीदवार नरेश मीणा ने 41 हजार 121 वोटों ऊं सिकस्त दीनी। सलूमबर मांय भाजपा री शांता अमृत लाल मीणा भारत आदिवासी पार्टी रा जितेश कटारा ने एक हजार 285 वोटों ऊं हराया। दूजी कानी चौरासी मांय भारत आदिवासी पार्टी रा अनिल कटारा भाजपा रा कारीलाल ऊं 24 हजार 370 वोटों ऊं जीत गया। दौसा मांय कांग्रेस रा दीनदयाल भाजपा रा जगमोहन ने 2300 वोटों ऊं सिकस्त दीनी। कांग्रेस ई उपचुनाव मांय सात मांय ऊं 4 सीटां माथे खास मुकाबला मांय नी रह सकी। ई उपचुनाव मांय भाजपा री मोटी जीत पाछे पार्टी रा कार्यकर्ता घणा राजी निजर आ रह्या है। पार्टी रा नेता ई जीत ने प्रधानमंत्री नरेन्द्र मोदी री नीतियां अर प्रदेश मांय मुख्यमंत्री भजनलाल शर्मा री अगुवाई रो नतीजो बतायो है। मुख्यमंत्री ई जीत ने प्रधानमंत्री नरेन्द्र मोदी री रीति-नीति री जीत बतायी।

000

उपराष्ट्रपति जगदीप धनखड़ कह्यो है के सरकार चिकित्सा हलका मांय व्हेवण वाळा नवाचारां ने लगातार बधावो दे रही है। उपराष्ट्रपति आज जोधपुर मांय अखिल भारतीय आयुर्विज्ञान संस्थान-एम्स रा 64वां दीक्षांत समारोह मांय बोल रह्या हा। वे कह्यो के चिकित्सा हलका मांय नवाचारां री बदौलत कोरोना रा मुश्किल बगत मांय ई लाखां लोगां री जिंदगियां बचावण मांय कामयाबी मिली। उपराष्ट्रपति युवा पीढ़ी मांय नशा रा बधता शौक माथे चिंता जताता थकां कह्यो के नशा रे कारण नौजवानां मांय तनाव अर अवसाद बध रह्यो है।

वे कह्यो के ईलाज रा नुवा तरीकां सागे म्हाने प्राकृतिक चिकित्सा पद्धति ने ई काम लेवणी चाहिजे। वे चिकित्सा हलका मांय विशेष योग्यता अर्जित करण वाळा विद्यार्थियां अर डॉक्टरां रो मान कीनो।

000

सरकार संसद रा सियाळू सत्र ऊं पैली काल सगळी सियासी पार्टियां री मीटिंग बुलायी है। मीटिंग री सदरत रक्षा मंत्री राजनाथ सिंह करेला। मीटिंग मांय सरकार सत्र रे दौरान लोकसभा अर राज्यसभा रो काम-काज ठीक ढंग ऊं चलावणो तैय करण सारू सगळी पार्टियां ऊं मदद मांगेला। सियाळू सत्र सोमवार ऊं सारू व्हेला जो 20 दिसंबर ताई चालेला हालांकि, संविधान दिवस रा उपलक्ष मांय 26 नवंबर ने संसद री मीटिंग नी व्हेला।

000

केंद्रीय गृह अर सहकारिता मंत्री अमित शाह कह्यो है के केंद्र सरकार सहकारिता हलका रे मार्फत काश्तकारां री जिन्दगी बेहतर बणावण सारू लगातार काम कर रही है। वे आज नई दिल्ली मांय राष्ट्रीय सहकारी विकास निगम री मीटिंग मांय बोल रह्या हा। गृह मंत्री कह्यो के सरकार सहकारिता आंदोलन रे मार्फत जनता री जिन्दगी मांय सकारात्मक बदलाव लावण री लगातार कोशिश कर रही है। वे कह्यो के मोदी सरकार सहकारिता रे मार्फत देश ने खुद रे पाण ऊबो करण रो काम कर रही है।

000

प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 116वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। ओ कार्यक्रम आकाशवाणी समाचार री वेबसाइट अर न्यूज ऑन एआईआर मोबाइल एप माथे ई सुण्यो जा सकेला। ई सागे ई ओ कार्यक्रम आकाशवाणी समाचार, डी.डी. न्यूज, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई प्रसारित कर्यो जावेला।

000

राजसमंद मांय आज तीन नुवा कानूनां, साइबर अपराध अर ई-फाइलिंग रा बारा मांय सेमीनार राख्यी ज्यी। इण मांय राजस्थान हाई कोर्ट रा न्यायमूर्ति कुलदीप माथुर अर न्यायमूर्ति फरजंद अली ई सिरकत कीनी। न्यायाधिपति कुलदीप माथुर बतायो के सेमिनार मांय नुवा आपराधिक कानूनां रा बारा मांय जाणकारी दीरीजी। सेमीनार मांय विधायक दीप्ति किरण माहेश्वरी अर जिला अर सेशन जज राघवेन्द्र काछवाल ई मौजूद रह्या।

000

भरतपुर रा केवलादेव राष्ट्रीय उद्यान मांय अब सैलानियां ने टिकट लेवण सारू लेण मांय लागण री ज़रूरत नी रहवेला। उद्यान प्रशासन ई सारू क्यूआर कोड जारी कीनो है, जिण ऊं सैलाणी मोबाइल ऊं टिकट ले सके है। म्हाणा खबरनवीस बतायो के ई प्रक्रिया ऊं टिकट सस्तो मिलेला।

000

बीकानेर मांय सिंगल यूज प्लास्टिक काम लेवण ऊं रोकण सारू थैला बैंक बणायी ज्यो है। महापौर सुशीला कंवर राजपुरोहित अर संभागीय आयुक्त वंदना सिंघवी आज कपड़ा रा थैला बेचण वाळी दो ऑटोमैटिक मशीनां रो उद्घाटन कीनो। आं मशीनां मांय 10 रुपया रो सिक्को डालता ई कपड़ा रो थैलो आप ऊं आप निकळे है। अ मशीनां कोटगेट सब्जी मंडी अर गंगाशहर रा सदर बाजार मांय लगायी ज्यी है। महापौर सुशीला कंवर कह्यो के आ सिंगल यूज प्लास्टिक ने रोकण सारू सार्थक कोशिश है।

000

पाली मांय टोबैको फ्री यूथ कैम्पेन 2.0 रा आखिरी दिन आज तम्बाकू एवं धूम्रपान निषेध अधिनियम रो उल्लंघन करण वाळा दुकानदारां रे खिलाफ कार्यवाही करी ज्यी अर सार्वजनिक ठौड़ां तम्बाकू काम लेवण वाळां रा चालान

करी ज्यो। जिला री न्यारी-न्यारी स्कूलां अर कॉलेजां मांय विद्यार्थियां ने तम्बाकू काम लेवण रा गलत असर री जाणकारी देवण बाबत् भांत- भांत रा कार्यक्रम राख्यी ज्यो। ई अभियान रो खास मकसद नौजवानां ने तम्बाकू काम लेवण रा नुकसान रा बारा मांय जाणकारी देवणो है। ई बीचे हनुमानगढ़ जिला रा टिब्बी कने सुरेवाला गांव मांय आज मानस अभियान रा तहत नशामुक्ति शिविर लगायी ज्यो।

000

प्रदेश मांय ठण्ड रो असर बढतो जा रह्यो है। केई ठौड़ां सुबह शाम तेज ठण्ड महसूस करी जा रही है। घणखर ठौड़ां रात री बगत पारो 11 डिग्री सैल्सियस ऊं नीचे रह्यो। भीलवाडा, सीकर, चित्तौडगढ़, उदयपुर, चूरू, सिरौही अर जालौर मांय पारो दस डिग्री सैल्सियस ऊं नीचे रिकॉर्ड करी ज्यो। पहाड़ां माथे व्हे रही बर्फबारी सागे बाज रह्यो सीळो बायरो प्रदेश मांय सर्दी रो असर बधा दीनो है। माउण्टआबू मांय आज ई न्यूनतम तापमान पांच डिग्री सैल्सियस दर्ज करी ज्यो। मौसम केन्द्र जयपुर रे मुजब आज श्रीगंगानगर, हनुमानगढ़, चूरू, सीकर अर झुंझुनूं जिला मांय घणी धुंअर रही।

000

केंद्र सरकार टी.बी. रा मरीजां ने राष्ट्रीय टीबी उन्मूलन कार्यक्रम रा तहत दी जावण वाली मदद री रकम बधा दीनी है। अब टी.बी. रा मरीजां ने हर महीना पांच सौ री बजाए एक हजार रुपया दिया जावेला। डीग रा जिला क्षय रोग अधिकारी डॉक्टर मान सिंह बतायो के जिला मांय टी.बी. रा करीब 1 हजार 400 मरीज है।

000

पंयायती राज मंत्री ओटाराम देवासी अर सांसद लुम्बाराम चौधरी आज सिरौही जिला रा शिवगंज मांय रीको हलका मांय सड़क रो शिलान्यास कीनो। कार्यक्रम मांय देवासी कह्यो के आमजन उद्योगपतियां अर सरकार रो एक ही लक्ष्य है हलका रो विकास अर वां मांय सगळां ने भागीदारी निभावणी चाहिजे। वे कह्यो के जिला मांय राईजिंग राजस्थान इनवेस्टर्स मीट रे मार्फम उद्योगपतियां कानी ऊं न्यारा-न्यारा हलकां मांय निवेश कर्यो जा रह्यो है अर ई सागे ई दिसम्बर मांय मुख्यमंत्री भजन लाल शर्मा री अगुवाई मांय राईजिंग राजस्थान ग्लोबल इनवेस्टमेन्ट समिट रो ई आयोजन व्हेला जिण ऊं प्रदेश मांय रोजगार अर निवेश रा काम व्हेला।

000